

Odluka kojom se proglašava Zakon o izmjenama i dopunama Zakona o zaštiti dobara koja su odlukama Komisije za zaštitu nacionalnih spomenika proglašena nacionalnim spomenicima BiH

Koristeći se ovlaštenjima koja su mi data članom V Aneksa 10 (Sporazuma o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja navedenog Mirovnog ugovora; i posebno uzevši u obzir član II 1. (d) istog Sporazuma prema kojem Visoki predstavnik “pruža pomoć, kada to ocijeni neophodnim, u iznalaženju rješenja za sve probleme koji se pojave u vezi sa civilnom implementacijom”;

Pozivajući se na stav XI 2 Zaključaka Vijeća za implementaciju mira koje se sastalo u Bonu 9. i 10. decembra 1997. godine, u kojem je Vijeće za implementaciju pozdravilo namjeru Visokog predstavnika da iskoristi svoj konačni autoritet u zemlji u pogledu tumačenja Sporazuma o civilnoj implementaciji Mirovnog ugovora da bi pomogao u iznalaženju rješenja za probleme, kako je prethodno rečeno, “donošenjem obavezujućih odluka, kada to bude smatrao neophodnim,” u vezi sa određenim pitanjima, uključujući (u skladu sa podstavom (c) ovog stava) i “druge mjere u svrhu osiguranja implementacije Mirovnog sporazuma na čitavoj teritoriji Bosne i Hercegovine i njenih entiteta”;

Uzimajući u obzir činjenicu da je propisna zaštita, konzervacija, prezentacija i rehabilitacija proglašениh nacionalnih spomenika u Bosni i Hercegovini od izuzetnog značaja za proces pomirenja u cijeloj Bosni i Hercegovini kao i za povratak raseljenih osoba i izbjeglica u njihova prijeratna prebivališta;

Imajući na umu da je u članu V(5) Aneksa 8. Općeg okvirnog sporazuma za mir u Bosni i Hercegovini predviđeno sljedeće: " U svakom slučaju u kome Komisija odluči da neku imovinu proglasi nacionalnim spomenikom, entitet na čijoj se teritoriji nalazi ta imovina će (a) nastojati da poduzme sve odgovarajuće pravne, naučne, tehničke, administrativne i finansijske mjere potrebne radi zaštite, konzerviranja, prezentacije i rehabilitacije te imovine, i (b) uzdržavaće se od namjernog poduzimanja mjera koje mogu oštetiti tu imovinu."

Uzimajući u obzir da su zakonom koji je usvojila Federacija u vezi sa provedbom odluka Komisije za zaštitu nacionalnih spomenika iz Aneksa 8. obuhvaćeni i spomenici o kojima nije odlučila Komisija;

Uzimajući u obzir da je zakon koji je usvojila Federacija u vezi sa provedbom odluka Komisije za zaštitu nacionalnih spomenika iz Aneksa 8. potrebno uskladiti sa zakonom Republike Srpske kako bi se osiguralo da procedura u oba entiteta bude jednoobrazna;

Uzevši u obzir i razmotrivši gore navedena pitanja u cijelosti, donosim sljedeću odluku kojom proglašavam

Zakon o izmjenama i dopunama Zakona o zaštiti dobara koja su odlukama Komisije za zaštitu nacionalnih spomenika proglašena nacionalnim spomenicima Bosne i Hercegovine

Zakon o zaštiti dobara koja su odlukama Komisije za zaštitu nacionalnih spomenika proglašena nacionalnim spomenicima Bosne i Hercegovine ("Službene novine Federacije Bosne i Hercegovine" br. 02/02), mijenja se i glasi :

1. Naslov zakona odsada glasi "Zakon o provedbi odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini".

2. Član 2., stav 1. mijenja se i glasi:

"Nacionalni spomenik" je dobro koje je Komisija proglasila nacionalnim spomenikom u skladu sa članovima V i VI Aneksa 8. Općeg okvirnog sporazuma za mir u Bosni i Hercegovini (u daljem tekstu: "Aneks 8."), kao i dobra upisana na priloženu Privremenu listu nacionalnih spomenika, sve dok Komisija ne donese konačnu odluku o njihovom statusu, a za šta ne postoji vremensko ograničenje i bez obzira na to da li je za dotično dobro podnesen zahtjev."

3. Član 7. stav 1. postaje stav 2. a ubacuje se novi stav 1. koji glasi:

"Ministarstvo uzima u obzir sve nalaze, objašnjenja i odluke Komisije donesene prema članu V(4) Aneksa 8."

4. Član 8. mijenja se i glasi:

"Pod uslovom da su ispunjeni kriteriji 2.(2), 6. i 7.(1) ovog Zakona, Ministarstvo izdaje potrebne dozvole za rehabilitaciju nacionalnih spomenika u roku od 30 dana od podnošenja zahtjeva."

5. Iza člana 15. stav 1. dodaje se novi stav koji glasi:

“To ni u kom slučaju ne usporava izdavanje dozvole za rehabilitaciju niti neku mjeru koja se poduzima u skladu sa tom dozvolom, ni neku drugu radnju koja se poduzima u skladu sa ovim Zakonom ili Aneksom 8.”

6. Ova odluka će biti objavljena odmah u Službenim novinama Federacije Bosne i Hercegovine i stupa na snagu na dan objavljivanja.

8. februar 2002. godine

Wolfgang Petritsch

Visoki predstavnik